



Karnerweiterung 2011



Begrüßung

Ihr Liebe Leit un Kerwegäscht,
es is bassiert, ich han's beferscht.
De demographisch Wannel hat mich erwischt,
e Nachfolger is net in Sicht.
Eigentlich wollt ich mich zur Ruhe setzete,
jetzt kann ich grad werre die Läder ruff wetze.
Die Straußjuchend is a nimmi ganz frisch,
leit nom zwölfte Pils schun unnerm Tisch.

Drum vornweg e persönlicher Appel:
Sorschen fer Nachwuchs, un zwar schnell.
Lossen beim Kerwekneppsche es Gummi grad fort,
dann kummt widder Lebe in de Ort.
Wer jetzt noch vor offene Frage steht:
De Lenzer saht eich gern wie's geht.

Während ich mir mit Woi jetzt die Lewwer ufweise,
dun die Straußborsch eich grad mo die Kerb okreische.

Thema 1 – Tabaksteuererhöhung

Als Kerwereddeschreiber werd mer mit de Zeit a ernschter,
deshalb lehn ich mich mo weit aus'm Fenschter,
unser erstes Thema is politisch brisant,
und allen Rauchern wohlbekannt.

Als wär' des Rauchverbot in Gaststätte net grad genuch,
werd a noch stännisch die Tabaksteuer erhöht, e wahrer Fluch.
Die letscht Erhöhung war geradezu dreist,
so hoch dass e Loch in de Gelbeidel reißt.
E Päckche Kippe koscht jetzt 55 Dotze,
wann ich's eich sah, do brauchener net se glotze.

Das hat kürzlich große Welle geschlah,
als uff de Pälzerwaldhütt e Betriebsfeier vum Rittersbacher war.
Die Feier war gut organisiert, es Angebot breit:

- Cola Light
- Fanta Light
- un veränzelt sogar dumme Leit

Irgendwann warn bei änem die Klimmstängel all,
do hat der sich an e ortsosässischer Feierwehrmann gehal.
Der hat net lang gefackelt, un is mim Kollesch zum Fidibus gedackelt.
Dort han se geguckt wie wanns blitzt e Kuh,
de Holger war in Urlaub, de Fidibus zu.

Wo mer sunscht nachts in Olschbrigge Kippe kafe kann,
hat iwwerleht unser Feierwehrmann.
Gerüchterhalber hat er sowas ufgeschnappt,
un is mim Kollesch Richtung Bahnhofstroß getappt.
Un wie de Zufall so will, war an dem Dah
Owwe Ohne Bedienung in de Flamingo Bar.
Do hat de Kollesch sich net nur iwwer die Kippe gefräht,
und langt an die Detze änem vun denne Mäd.
Dann han se dem die Rechnung unner die Nas gehal

- 55 € fer e Päckche Kippe, er wär fascht vum Hocker gefall.

Ihr Leit, do soll noch Äner sache,
als Nichtraucher kennt mer net e haufe Geld spare.

Die Musik spielt dem Saunaschuppe
„Die Zuckerpuppe aus der Bauchtanzgruppe“

Thema 2 – Tour de Deutschland

Viele vun eich kenne es wohl,
es Sprichwort mit de groß Route iwwer Shop – Tirol.
Vier vun unsere Fußballer han e Tour gemacht,
in dere Schatte Shop – Tirol verblasst.

Die Frühstücksfahrt no Paris war ne zu schwach,
do han se e Tour de Deutschland gemacht.

Lautre
Stuttgart
München
Nürnberg
Dresden
Berlin
Hamburg

Un retour - in 24 Stunne nur.

In jeder Stadt han se mit Bedacht,
e halbie Stunn die Sehenswürdigkeite betracht.

So alle 500 Kilometer han se de Fahrer gedauscht,
un e annerer is iwwer die Autobahn gerauscht.
Die Geschwindigkeitsschilder hat **käner** so ernscht genumm,
Sie hatten jo zum Ziel 24 Stunn.

No änem Fahrerwechsel is dann äner aus de Werschbacher Stroß
Fröhlich iwwer die Autobahn gebloss.
Quasi Kurz vorm näggscht Fahrerwechsel isses bassiert,
e Radarfall hat ne inkassiert.
Debei hät er sei Schicht schon fascht geschafft,
er hat immerhie schon 2-3 km gemacht.

Mer muss zu seiner Entlaschtung sah,
beim Kollesch aus de Hauptstroß hat die Radarfall a zugeschla.

Die Musik spielt nicht irgendwas,
sie spielt von Markus „Ich will Spaß“

Thema 3 – Querfeldin

Wo mer grad beim Thema sin,
mir fällt do noch was anneres in.
Im Rahme seiner Vorstandspflicht,
is de Dieter kürzlich no Edekobe gezischt.
In de Sportschul hat er zu änem Termin gemuscht,
awwer wie mer do hie kommt hat er net gewuscht.

Zum Glück hat em äner de Weg beschribb,
is dodebei awwer e bisje Faul geblibb.
„Kreutz Frankethal, Kreutz Mutterstadt, bei Schauernheim ab,
bische quasi schun do, die letschte paar Meter noch de Schilder no“

De Dieter hat sich in sei Ford Cougar geschwung,
un hat em Ronny sei Route genumm.
Ab Schauernheim isser iwwer die Käffer gefahr,
hat awwer net so recht gewuscht wo Edekobe war.


In Meckeheim hat er e Passantin gefunn,
mit dere Ihrer Beschreibung isser bis no Maikammer kumm.
Dort war er nommo ins Grübele kumm,
hat awwer e ortkundisches Rentnerpaar gefunn.
Die wollten eh no Edekobe uff e Weinfescht grad,
de Dieter hat se korzerhand ingelad.
Besser als mit Garmin, Becker odder TomTom,
is er mit denne in Edekobe ohkumm.
Hat die zwä an Ihrem Fescht rausgeschmiss,
un die han em noch die letschte Meter gewiss.

Mitte uffm Weinberg macht de Dieter dann halt,
es Kartematerial vun dem Rentnerpärche war wohl e bissje alt.
De Dieter muscht sich uff sei Instinkte verlosse,
un is dank Allrad spielerisch dorsch die Weinberje geschosse.
Irgendwann hat er die Sportschul gesieh,
querfeldin isser dan hie.

Uff de Rückfahrt hat er dann die Autobahnuffahrt Edekobe genumm,
un hat am Stick ah häm gefunn.

Die Musik spielt dir, das macht Sinn
„Der Dieter fährt irgendwo hin“

(Wir Zwei fahren irgendwo hin)



Der Dieter fährt irgendwo hin,
und hat das auch gar keinen Sinn.

Er lässt die Arbeit Arbeit sein und
pfeift auf den Gewinn.

Der Dieter fährt irgendwo hin.

Thema 4 – Die drei Fremde

Um jetzt in de Familie se bleibe,
muss ich eich e Kurzgeschichte unner die Nas' noch reibe.
Es Evi hat neulich Frau Wertschaft gespielt,
un nebebei aus em Fenschter geschiet.
Wesche de Flutlichter wurd grad e Begehung gemacht,
das hat es Evi sich mo betracht.

Sie dreht sich dann zu änem Gascht noch hie:
„Wer sinn dann die drei do, die hann ich jo noch nie gesieh“

Später sinn se am Sportheim vorbeigerennt die Drei,
do sahts Evi: **„Ach Gott, do is jo meiner debei!“**

Evi, zum Wohle eurer Ehe,
det ich demnächst mo zum Optiker gehe.

Die Musik spielt für dich jetzt an, wie passend
„Schöner fremder Mann“

Thema 5 – Der Polterabend

Ihr leit, ich trink jetzt nommo äänner,
die nägscht Geschicht werd nämlich länger.

Geschicht is unnertrieb, Geschichteband werd dem eher gerecht,
un alles is an odder um ä änzisch Ereignis gewescht.
Es war de Polterowend vun em Christman Hagen,
dem will ich an der Stell nommo Danke sagen,
das er hat de Grundstä geleht,
fer alles was han sei Gäscht gedreht.

Bevor ich awwer alles berichte,
will ich an de Hagen uns Konny mei Glückwünsche richte.
Ich wünsch eich fer die Zukunft nur es Besch, t
Gesundheit, Glück un vernünftische Gäscht.

Beim Polterowend is de erschte ufgefall,
indem er sich gar net hat dort ufgehall.
Dem war uf em Betriebsausflug irgendwas Schlimmes bassiert,
dodebei hat er sich furchtbar die Bless verschammeriert.
Was genau bassiert is hat er fer sich behall,
ich vermute, er is uff de Rand vun änem Duppeglass gefall.
Oder er hat fer e Arbetskollesch Schlä ingesteckt,
weil der sich hat mo werre mit 55€ Kippe ingedeckt.

De näggscht Held vun dem denkwürdisch Daa,
Wurd nachts noch no Lautre in die Ambulanz gefahr,
Ihn hat so e Art Riverdance gepackt,
dobei is er voll in e Scherb nei geschlappt.
Die Scherb is sauber dorsch die Sohl geploppt,
un hat dem Arm Deibel de Fuß uffgeroppt.
In de Ambulanz hatt er dann e Zeit lang gewart,
dass er genäht werre müsst hat mer em dann gesaht.
Nommo se warte war em dann se bleed,
also hat er verkündet, dass er jetzt mo geht.
Sie han ne noch halbwegs zur Vernunft gebrung,
zwar net genäht, awwer wennischtens verbunn.

Die Musik spielt zu deinem Dänzje,
vun Ernst Neger „Heile Gänsje“

Zum Schluss getoppt han dann des Ganze
E langer und äner mit änem Ranze,
Die han sich erscht beim Hagen zugekippt,
und sich dann noch dorsch de Ort getribb.

Am näggschte Daa war's Spiel gehe Kölln,
un es Köllner Maskottsche, Hennes de Acht,
der hat in Olschbrigge iwwernacht.
Dass des Spiel gehe die Köllner a was gebbt,
han se de Hennes äfach gebocknäppt.

Die han sich gedenkt, die Polterowend is schun rum,
un sin mit dem Bock nomma am Sportheim vorbei kumm.
Es war awwer doch noch jemand drunne,
der hat des Bild ganz lustisch gefunne,
ruft dem mim Ranze noch voller Witz:
Die Ohre vun deinem Hund sin awwer ganz schä spitz!

De lange hat viel fer die Vertuschung gedu,
bei zisch Leit ogeruf un gefroht no seine Schuh.
Wahrscheinlich weil mer uff Socke leiser geht,
hat er die nämlich am Radwesch abgeleht.
Sei Schlüsselbund hat er a noch unnerwegs versteckt,
un bis heit net widderentdeckt.

Die Musik spielt eich, ach du Schreck,
„Ei ei ei, de Goaß is weg“

Thema 6 – Gudi Planung is alles

Zum Schluss, wer hätte das gedacht,
hat's de CSG in unser Kerweredd geschafft.
Weil se fer Ihr Kerweredd kä Wolle han,
han se fer die Musik gebraucht e annerer Mann.

Ogeruf han se, voller Bedacht,
e Gittarischt der johrelang mit mir hat Musik gemacht.
Der studiert bei Eisenach un hat sich vor 3 Daach bei mir gemeld,
ob ich inspringe kennt, fer sei Fahrtkoschte hätt de CSG kä Geld.
Leider, leider kunnt ich net hien,
wie ner siehe hat ich schon e annerer Termin.

Ich war awwer froh, dass se die Erkenntnis han,
dass mer die eigene Musiker känem odue kann.

Weil fer Fahrtkoschte em CSG sei Budget is se knapp,
ziehn die eich jedes Johr e haufe Intritt aus em Sack.

Ihr Leit, sparn eich näggscht Johr grad des Intrittsgeld,
beim TuS is es eh schöner als bei de Ohrequäler im Zelt.

Unsere Straußborsch singt denne Knallköpp froh,
„So geht de CSG, de CSG geht so...“

Verabschiedung

Wer seit de letscht Kerb noch was hat gedreht,
darf sich jetzt frähe, dass er de Kerweredd entgeht.
Er hat's dann scheinbar gut vertuscht,
sunscht hätt' ich's nämlich schun gewuscht.

Ich hoff Ihr sin jetzt e bissje heiter,
un machen grad im Sportheim weiter.
Wenn eich mei Redd hat gut gefall,
kaafen se schnell, bevor se is all.
Das Geld werd vun mir sicher verwalt,
un investiert in e paar Meter Alt.

Jetze schaffen eich ninn, gebben aus eier Geld,
die Olschbrigger Kerb is die schännscht uff de Welt.